



## **Crèsia de Santu Lisandru**

Custa crèsia fiat in d-un'àrea acanta a Bia Santu Milanu, de fronti a Bia de sa Cruxi.

In totu sa zona ddoi funt arrastus de una necròpoli romana e calancunu pentzat ca innoi fessat su villàgiu de Sestu Pitìu arremonau de s'Angius.

Custa crèsia benit sinnedda in d-una dispositzioni de su vicàriu generali de sa diòcesi de Casteddu in su 1580.

## **Crèsia de Santa Bàrbara**

Sa crèsia de Santa Bàrbara est arremonada in d-unu autu de su notàiu Bustianu Mameli in su 1683.

## **Sant'Esu**

De custa crèsia scieus scéti ca faiat parti de su villàgiu de Seurru.

## **Santu Sadurru**

De custa crèsia at pigau su nòmini su villàgiu chi oi, cumentì sa crèsia, est sparèssiu.



COMUNU DE SESTU  
TZITADI METROPOLITANA DE CASTEDDU

Est nomenada in s'inventàriu de sa Mensa Arcivescovili de Casteddu.

## Santu Perdu

De si chi si scit, sa crèsia de Santu Perdu est stètia sa primu a essi costruia n sa bidda de Sestu. Est arremonada in d-una pergamena de su 1200-1212, innui ddoi est iscritu ca su mussennori de Sueddi iat comperau terras acanta de sa crèsia e su muristeni.

Benit agoa nomenada in d-unu documentu eclesiàsticu de su 1312.

Arremonada fintzas in d-unu àteru documentu, in s'inventàriu de sa Mensa Arcivescovili de Casteddu fatu in su 1365.

In d-unu testamentu de su 1577 benit nomenada po una donatzioni, e fintzas in d-unu de su 1595.

De su XVII sèculu nc'at prus de unu documentu chi dd'arremonat po ddoi fai arràngius, in su 1612, in su 1622, in su 1650 e in su 1653.

Si pentzat ca in su 1701 ddoi fessat ancora, ma candu su mussennori de Casteddu est andau in vèsita a Sestu in su 1761, no benit arremonada e po custu si podit nai ca fiat sparèssia.



## **Crèsia de Santu Bustianu**

Fiat in su sartu, ingiriada de bingias, mancai no fiat aillargu de sa bidda. Benit costruida impitzus de is arroinas de sa crèsia de Santu Lisiandru e acabada in su 1580.

In su 1597 benit sinnalada poita ca ddi est sa crabetura de arrangiai e su portali si depit serrai a crai o totus ddoi podint imbucai in dònna momentu.

In su 1622 est beni posta, ma in su 1676, 1680 e 1703 si faint arràngius e est craru ca assumancu po s'arrecurrèntzia de sa festa si faiant celebratzionis.

Ma agoa in su 1761 su mussenniori at decèdiu de dda scunsacrai poita ca fiat abandonada, cun òbrigu de ndi sterrai is mortus chi ddoi podiant essi e a ddus ingolli a s'ossaja de sa crèsia de Sangu Giorgi.

## **Santu Micheli**

Santu Micheli fiat sa crèsia de su villàgiu de Sinnuri, acanta de su Riu Sassu, e ddu scieus de unu regulamentu de politzia rurali de su 1850.

Est nomenada in d-unu testamentu de su 1577, in is atus po s'abisita de su munsinniori in su 1597 e in su 1622, e in su testamentu de su canònicu Antioco Matza Loy de su 1605.

In su sèculu XVIII sa crèsia benit abandonada e in su 1761 benit scunsacrada.



## **Madonna d'Ìtria**

Fiat in d-una pratzixedda acanta a Bia Roma, faci a sa Pratza Rinàscita. De is relatzionis de is munsennioris si scit ca est stètia fata infra de su 1622 e su 1629.

Benit nomenada in prus de unu testamentu, e fintzas a su 1809 sa Madonna d'ìtria benit afestada.

In su 1857 sa crèsia est scunsacrada e sdorruida de unus cantus annus, e su Cunsillu Comunali at pentzau de dd'imperai po ddoi fai su munitzìpiu. No benit fatu s'acòrdiu cun sa cùria e po custu crèsia e pratza benint lassaus a privaus.